

TE TAUNGA O TE IWI MAORI, 1921.

No tera wiki i tae mai ai te ripota ki te Paremata, i kitea ai, ko te tokomaha o te iwi Maori i te 31 o nga ra o Maehe, 1921, e 52,751. Katahi ano ko tae ki tena rawa te tokomaha. Inakoa tirohia nga taunga o era atu tau, timata mai i te taunga tuatahi i te tau 1874, ara—

Te Tau	Te Tokomaha	Te Pikinga	Te Hekenga
1874	45,470		
1878	43,595		1875
1881	44,097	502	
1886	41,969		2128
1891	41,994	24	
1896	39,854		2139
1901	43,143	3289	
1906	47,731	4588	
1911	49,844	2113	
1916	49,776		68
1921	52,751	2975	

E ahua whakateka ana te ripoata ki te kaha rawa o te pikinga ake o te tokomaha i te tauanga o te tau 1921 ki runga ake i te tau 1916, a e whakapae ana na te mea i te ngaro etahi ki te pakanga i te tau 1916. Otira ki te whakaarohia e tataau, kaore i nuku rawa ake i te kotahi mano nga hoia Maori i haere ki te pakanga i mua atu i te taunga o te tau 1916; a ki te whakaarohia e 300 nga hoia Maori i mate atu ki te pakanga, a i nuku atu i te 1500 nga Maori i mate i nga mate aruta (influenza) i te tau 1918 tae mai ki te timatanga o te tau 1921, he mea miharo rawa te pikinga ake i te tau 1921, ara e 2975 te nukunga ki runga ake i te tau 1916. Ko

te tikanga ia kia heke iho. He tohu tenei kei te ora te iwi Maori, kei te nuku ake nga tamariki i whanau mai i nga tu-papaku i mate atu. Kaore hoki ra he matipuna ke o te iwi Maori i waho hei whangai mai, penei i nga heke o te iwi pa-keha e rere mai nei i tawahi.